

元史

元史

元史類編卷之四十一

仁和邵遠平戒山學 南沙席世臣郢客兵校刊

雜行

李璫 王文統 鐵失 囊加台 禿堅 阿魯輝

孛羅帖木兒 擴廓帖木兒 李邦寧 樸不花

埜先帖木兒 八思巴 楊璉真珈 伽憐真

邱處機 張宗演 鄺希誠 李居壽

田忠良 張康 靳德進 愛薛 許國禎 孫威

阿老瓦丁 阿尼哥 迦魯納答思 韓林兒

徐壽輝 陳友諒 張士誠 方國珍

李璫小字松壽 濰州人 李全子也 太祖十六年

全叛宋迎蒙古兵入青州國王孛魯承制授全山東淮南楚州行

省太宗三年全攻宋揚州敗死瓊襲益都行省得專制其地朝廷
數徵兵輒詭辭不至憲宗南征調其兵赴行在瓊親見帝言益都
乃宋航海津要分軍非便帝然之命還擊漣海數州瓊遂發兵攻
拔漣水相連四城大張尅捷之功中統元年世祖卽位加江淮大
都督瓊言近謀知宋人將調兵攻漣水且遙聞許浦射陽湖舟艦
相望勢欲出膠西向益都請繕城塹爲備詔出金符十銀符五授
之賞將士凡蒙古漢軍之在邊者咸聽節制瓊復揚言宋呂文德
合淮南兵七萬五千來攻漣水且規築堡寨以臨我及得賈似道
書辭甚悖倣知廷近有內顧憂必將肆志於我乞選將益兵臣當
帥先渡淮以雪慢書之辱執政得奏諭以朝廷方通和議邊將惟
當固守封圉且南人多用間計不可信敵既不至毋或妄動瓊又
言臣所領益都土曠人稀自立海州迄今八載將士未嘗釋甲轉

輒未嘗息肩民力凋耗獨甚以區區一路之兵抗一敵國衆寡不
侔人所共患賴陛下神武旣克漣海二州復破夏貴孫虎臣十餘
萬衆然臣豈敢持此保敵人之不再至哉且宋人今日西無掣肘
宜得并力而東若以水陸綴漣而遣舟師遵海以北直擣膠萊之
虎然後帥步騎驟指沂莒滕嶧間則山東非我有矣豈可易視而
不爲備臣昨追敵至淮安非不能乘勝取揚楚徒以執政止臣故
臣不敢深入若以棗陽唐鄧陳蔡諸軍攻荆山取壽泗以毫宿徐
邳諸軍合臣所統兵攻揚楚則兩淮可定兩淮旣定則選兵以取
江南自守以寬民力將無施不可因上將校等功狀詔出益都官
銀分賞之二年正月璫言於行省謂宋人聚兵糧數十萬列艦萬
三千艘于許浦以侵內郡而宣撫司轉輸不繼恐一旦水陸道絕
緩急莫報請選精騎倍道來援表裏協攻乘機深入江淮可圖也

既而來獻漣水捷詔復加獎諭仍給金符十七銀符二十九增賜將士壇輒發兵修益都城塹且報宋人來攻漣水帝遣愛仙不花等悉兵赴援壇固請節制諸道所集軍且求益軍器詔給矢十萬三年二月又以賈似道誘總管張元張進等書來上益壇自專制山東三十餘年前後所奏數十事無非挾敵國以要朝廷而自爲完繕益兵計初遣其子彥簡質於朝而潛爲私驛自益都至京師質子營至是彥簡乘私驛逃歸壇遂反以漣海三城獻於宋并獻京東諸郡縣請贖父罪宋封壇齊郡王俾殲蒙古戍軍引麾下具舟艦還攻益都入之發庫藏以犒其黨尋遣騎寇蒲臺陷淄州民聞壇反皆入保城郭或奔竄山谷間自益都至臨淄數百里寂無人聲帝下詔暴其罪發諸軍討之一會東平一會濱棣命諸王哈必赤總軍事壇盜據濟南三月復命史樞阿朮以兵赴濟南壇帥

衆出掠輜重將及城官軍邀擊大敗之璫退保濟南四月命丞相
史天澤專征比至築環城圍之璫自是不得出猶日夜拒守取城
中子女賞將士以悅其心且分軍就食民家盡發其蓋藏不足則
家予之鹽令殺人爲食於是人情益潰各什伯相結縋城出降六
月宋遣青陽夢炎帥師來援不敢進璫知城且破乃手刃愛妾乘
舟入大明湖自投水中不死爲官軍所獲囚至諸王哈必赤帳前
天澤請速誅之以安反側遂支解其體於軍門計璫所傷漣水軍
民及陷宋蒙古探馬赤軍數男婦凡七千九百餘人萬戶阿里必
嘗發璫逆謀爲所殺至正十一年以其子刺吉襲職

大方通鑑云宋贈璫檢校太師賜廟

額曰
顯忠

王文統字以道益都人少讀權謀書好以大言撼人遍于諸侯無
所遇乃往見李璫璫與語大悅留置幕府命其子彥簡師事之文

統卽以女妻璵由是軍旅之事咸與諮決歲上邊功虛張敵勢以固其位用官物樹私恩取宋漣海二郡皆文統謀也世祖卽位有薦其才智者亟召用之命平章中書省事日見親幸乃建元爲中統立十路宣撫使司示以條格欲差發辦而民不擾鹽課不失常額交鈔無致阻滯更造中統元寶交鈔立互市于潁州漣水光化

軍

大方通鑑云文統初造通行交鈔以絲爲本以革爲路行用鈔法之弊其法以銀五十兩易絲鈔千兩

明

年二月世祖在開平召行中書省事禡禡與文統親率各路宣撫使赴闕世祖自去秋親征叛王阿里不哥于北方凡民間差發宣課鹽鐵諸事一委文統裁處及還未知可否故召文統等至責以成效復頒所議條格于各路中嚴私鹽酒醋麪貨禁信在倍專文統爲人忌刻惟以如賢嫉能爲心初立中書省張文謙爲左丞凡議論建白輒相齟齬文統積不平思有以陷之文謙竟以本職行

大名宣撫事去姚樞竇默許衡皆世祖所敬信者文統諷世祖授
三人爲太子師傅官佯尊之實不欲使朝夕備顧問也默嘗與王
鶚及樞衡同侍世祖面詆文統曰此人學術不正必禍天下不可
處以相位世祖且不憚而罷文統乃不自安潛蓄異志及李壇反
以渾海三城獻於宋先是壇子彥簡由京師逃歸壇遣人白之中
書及反書聞人言文統嘗遣子蕤與壇通聲息世祖召問曰汝教
壇爲逆積有歲年舉朝皆知之朕今問汝所謀云何文統曰容臣
悉書以對書畢命讀之有曰螻蟻之命苟獲存全保爲陛下取江
南世祖曰汝今日猶欲緩頰於朕邪會得文統與壇書上示之文
統始錯愕駭汗書中有期甲子語上問甲子之期云何對曰李壇
久蓄反心以臣居中不敢卽發臣欲告陛下縛壇久矣第緣陛下
弭兵北方猶未靖也比至甲子猶可數年臣爲是言姑遲其反世

祖曰無多言朕拔汝布衣中授之政柄遇汝良厚何負而爲此文
統猶支吾命左右斥出就縛立召竇默姚樞王鶚及張柔等至示
以前書曰汝等謂文統當得何罪衆言人臣無將將則必誅柔獨
疾聲大言曰宜剛世祖曰汝等同辭言之皆曰當死世祖曰渠亦
目服朕前矣文統乃伏誅子堯并就戮文統雖以反誅而元之立
國規模法度世謂多出其手云

鐵失故丞相鐵木迭兒義子也當英宗卽位之初由翰林學士承
旨爲宣徽太醫二院使至治元年特授御史大夫佩金符領忠翊
侍衛親軍都指揮使依前院使如故旣又命領左右阿速衛軍帝
親祀太廟以左丞相拜住爲亞獻官鐵失爲終獻官治書侍御史
鎖南者鐵木迭兒子也先以罪罷鐵失請復其官帝不許嘗謂臺
臣曰朕深居九重臣下姦弊豈能周知故用卿等爲耳目曩者鐵

木迭兒貪蠹無厭汝等何緘默不言其人雖死宜籍其家以懲後
司徒劉夔坐妄獻地土冒取官錢伏誅鐵木迭兒子宣政使八刺
吉思授夔冒獻鐵失同受賂事覺帝曰法者祖宗所制非朕得私
八刺吉思雖事朕久既有罪宜論如法卽誅之鐵失幸獲免命獨
署御史大夫事會御史臺請降旨開言路帝曰言路何嘗不開但
卿等選人未當耳朕知嚮所効者率因宿怨羅織成獄加之以罪
遂玷其人終身不得白御史嘗舉八刺吉思可任大事太幾以貪
敗若此者言路選人當乎否乎是時鐵木迭兒旣死罪惡日著帝
任拜住爲右相思欲振立紀綱進賢退不肖爲務嘗戒羣臣曰卿
等居高位食厚祿當善自保若爲不法必刑無赦鐵失以奸黨與
誅潛蓄異圖三年秋八月帝自上都還駐蹕南坡是夕鐵失與知
樞密院事也先鐵木兒諸王按梯不花等相聚謀逆以鐵失所領

阿速衛軍爲外應夜二鼓殺丞相拜住鐵失直犯行幄手弑帝于臥所九月四日晉王卽位收鐵失及其黨誅之大都籍其家并戮其子孫

囊加台未詳何許人文宗初官四川行省平章時泰定帝方崩丞相倒刺沙擁兵上都令諸王分道犯京畿囊加台乘國釁擅殺本省平章寬徹等自稱鎮西王以左丞脫脫爲平章前雲南廉訪使楊靜爲左丞稱兵燒絕棧道烏蒙教授杜巖肖謂聖明繼統宇內大寧當罷兵入朝囊加台怒其妄言惑衆杖囚之御史臺言囊加台拒命西南罪不容逭宜追奪其制敕帝方降詔許自新弗聽天歷二年正月遣近侍星吉班持詔招諭拒不納尋攻播州猶兒堽隘宣慰使楊燕里不花開關納之陝西蒙古軍都元帥不花台者囊加台弟也遣使賁家函招之不花台不從斬其使播州楊萬戶

引川賊至烏江峯遇官軍敗之八番元帥脫出亦破烏江北岸賊奪回關口旣而囊加台焚鷄武關大橋奪三义柴關等驛以書誘輩昌總帥汪延昌分兵至金州據白工關進逼襄陽朝命鎮西武靖王搠思班調湖廣兵討之齊王月魯帖木兒統軍五萬至播州招各土官之從逆者楊燕里不花等降囊加台益負險自固詔立行樞密院以山東萬戶也速答兒知院事調河南江浙江西山東兵萬人及左右翼衛衛軍由四川進討囊加台所遣守隘砦門安撫使布答思監等赴雲南乞降復命躍里帖木兒爲雲南右丞統兵繼往會湖廣參政孛羅奉詔至四川曲赦囊加台聽詔蜀地始平諸省兵皆罷囊加台坐指斥乘輿大不道伏誅平章寬徹廉訪使忽都魯養阿等皆爲其所害者並贈官與諡

諸王禿堅者先赴上都兵敗而逃文宗至順元年正月與萬戶伯

忽阿禾等據雲南叛陷中慶路殺廉訪司官尋攻陷仁德府至馬
龍川禿堅自立爲雲南王以伯忽爲丞相阿禾忽刺忽等爲平章
立城柵焚倉庫拒命朝廷簡乞住爲雲南平章帖木兒不花爲左
丞從豫王阿刺忒納失里由八番分道進討遙投烏蒙土官祿余
爲雲南參政使助軍四月四川行省復調重慶五路軍救雲南未
幾祿余殺烏撒宣慰官降於伯忽羅羅斯諸蠻俱叛與伯忽應帖
木兒不花遇害祿余以蠻兵據順元界立關固守復命諸王云都
思帖木兒將江浙河南江西兵以進五月羅羅斯土官撒加伯阿
漏阿刺里州土官德益等皆附祿余以叛會四川軍至雲南雪山
峽遇羅羅斯軍敗之賊稍却朝議復立行樞密院發朶甘思朶思
麻及鞏昌諸軍命河南平章徹里鐵木兒同武靖王搠思班由四
川陝西平章教化從豫王出八番兩路夾擊撒加伯合烏蒙土兵

攻建昌石永躍里帖木兒拒之斬獲亡算四川軍亦敗撒加伯于
蘆古驛而禿堅伯忽等勢日猖獗祿余亦乘勢連結東川芒部諸
蠻令伯忽弟拜延順襲順元路撒加伯復撤毀棧道遣把事曹通
潛結西蕃欲據大渡河進寇建昌躍里至建昌執曹通斬之詔趣
兩省各進兵於是四川平章埒出引兵由永寧左丞孛羅引兵由
青山芒部以印部州土官馬伯爲嚮導陳兵周泥驛祿余衆潰卽
奪其關隘與順元諸軍合撒加伯復攻建昌躍里與戰于木托山
敗之旣而仁德府權達魯花赤曲朮糾義旅討雲南敗伯忽兵于
馬龍川殺其弟拜延順再戰于馬金山獲伯忽誅之餘黨駭散獨
祿余猶據金沙江會埒出等將蜀兵抵烏撒境與祿余戰于七星
關六日凡十七戰賊大潰走俄而搠思班師次羅羅斯與躍里帖
木兒期至三治郎躍里倍道兼往奪金沙江阿禾引蒙古叛軍至

戰敗之阿禾夜遁大兵直趨中慶與賊連戰禽阿禾斬于軍前既而禿堅拒戰于伽橋古壁口兵方交躍里中流矢洞耳後拔矢復戰大捷遂復省治分兵追捕禿堅于嵩明州次年正月徹里鐵木兒孛羅等敗蠻兵射中祿余肩降其衆豫王阿剌忒納失里至當歸驛安輯人民禿堅使其弟必刺都迷失僞降於豫王陰以私圍之平章乞住妻子皆被掠禿堅方繕城固守諸軍協力攻破之禿堅不知所往事平各班師未幾撒加伯復掠良民爲亂祿余又會伯忽姪阿福領蒙古叛兵殺烏撒官吏遣西域指揮使鎖住發陝西兵直抵羅羅斯碣門兵截大渡河直趨邛部州五戰大破之蒙古元帥怯烈擊賊于靖江路海中破其柵禿堅弟必刺都迷失舉家赴海死

阿魯輝帖木兒太宗八世孫也襲封陽翟王順帝初立阿魯輝進

曰天下事重宜委宰輔決之庶可責其成效若躬自聽斷必負惡名帝信其言由是深居宮中每事無所與至正二十年汝穎盜猖獗天下震動帝屢詔宗王俾出北方兵南討阿魯輝乘間擁衆數十萬屯木兒古元微之地魯宗王反將犯京畿遣使言於帝曰祖宗以天下付汝汝何故失其大半若持國璽授我我當自爲之帝神色自若徐曰天命有在汝欲爲則爲之數降詔開諭令其悔罪不聽乃命知樞密院事禿堅帖木兒將兵討之行至稱海起哈刺赤萬人爲兵其人素不習戰旣陣兵未交皆解甲奔敵中禿堅帖木兒師敗單騎走上都更命少保知樞密院事老章以兵十萬臨之且令阿魯輝之弟忽都帖木兒從征大敗其衆阿魯輝謀東遁爲部將脫驪所擒送闕下帝命誅之仍以其弟忽都帖木兒襲封陽翟王加封老章和寧王嶺北行省丞相俾鎮北藩